

12

# DECLARATION D V R O Y.

Portant Reuocation en l'estendue de tout  
le Royaume, des Edicts de creation du sol  
pour liure, & droicts de seel & marque sur  
toutes sortes de marchandises, estoilles,  
ouurages & manufactures: Ensemble des  
droicts de parisis sur les voictures qui se  
font tant par eau que par terre, & autres  
contenus en ladite Declaration.

*Verifiée en la Cour des Aydes le 27. Aoust 1636.*



A PARIS,  
Par P. METTAYER, A. ESTIENNE  
& P. ROCOLET, Imprimeurs  
ordinaires du Roy.

---

M. DC. XXXVI.

*Avec Privilège de sa Majesté.*

51

Case 64


F

39

326

1636 f5d

THE NEWBERRY  
LIBRARY



OVIS PAR LA GRACE DE DIEV ROY DE FRANCE ET DE NAVARRE, A tous ceux qui ces presentes Lettres verront, Salut. Nous ayant esté fait di-  
verses plaintes par nos

subiets de la surcharge qu'ils reçoient de l'Imposition, tant du sol pour liure & droict de seel, ordonné estre leuez sur toute sorte d'estoffes & marchandises manufactures, par nostre Edict du mois de Juillet 1634. que du paris des Voictures par eau & par terre, ordonné estre estably par nostre Edict du mois de May 1635. & Arrests de nostre Conseil donnez en consequence : Et voulans pourvoir au soulagement de nos bons & fideles subiets, & leur donner tous les moyens possibles de s'employer d'autant mieux & plus volontiers à leur conseruation dans les occasions presentes. SCAVOIR FAISONS, qu'apres avoir fait mettre ceste affaire en deliberation en nostre Conseil, où estoient nostre tres cher & tres-amé Frere vnique le Duc d'Orleans, aucuns Princes & Officiers

de nostre Couronne, & autres grands & notables personages de nostredit Conseil: De l'Aduis d'iceluy, & de nostre certaine science, pleine puissance & autorité Royale: Nous auons dit, déclaré & ordonné, Disons, declarons & ordonnons, Voulons & nous plaist, Qu'en tout nostre Royaume, Pays, Terres & Seigneuries de nostre obeyssance, Tous Marchands & autres nos subiects, demeurent exempts, quittes & deschargez, comme nous les exemptons, quittons & deschargeons, dudit droit de sol pour liure, & droit de seel & marque, ordonnez estre leuez par nostredit Edict du mois de Iuillet 1634. sur toutes & chacunes les marchandises, estoilles, ouurages & manufactures y mentionnees: Ensemble du paris de Voictures par eau & par terre, ordonné estre estably par ledit Edict du mois de May 1635. Deffendons tres expressement aux Fermiers de nos Aydes & cinq Grosses Fermes, & à tous sous-Fermiers, leurs Commis & tous autres, d'exiger de nos subiects en quelque lieu que ce soit de nostre Royaume & pays de nostre obeyssance, lesdits droicts du sol pour liure & de seel, & paris des Voictures, à peine

d'amende.

SI DONNONS EN MANDEMENT À



nos amez & feaux les Gens tenans nos Cours  
 des Aydes, Presidens & Tresoriers Gene-  
 raux de France aux Bureaux de nos Finan-  
 ces, & tous autres nos Iusticiers & Officiers  
 qu'il appartiendra, Que ces presentes il fas-  
 sent lire, publier & enregistrer: & le conte-  
 nu en icelles, garder, observer & entretenir,  
 sans y contreuenir, ny permettre qu'il y soit  
 contreuenue en aucune maniere, nonobstant  
 oppositions ou appellations quelconques,  
 pour lesquelles ne Voulons estre differé:  
 Nonobstant aussi nosdits Edicts, & tous au-  
 tres Edicts, Declarations, Arrests, Regle-  
 mens, & autres choses à ce contraires, Auf-  
 quelles & aux defrogatoires des defrogatoi-  
 resy contenuës, Nous auons defrogé & def-  
 rogeons par celdites presentes: Et d'autant  
 que l'on en pourroit auoir affaire en plu-  
 sieurs & diuers lieux, Nous voulons qu'aux  
 coppies d'icelles, deuëment collationnees  
 par l'un de nos amez & feaux Conseillers &  
 Secretaires, foy soit adioustee comme au  
 present Original: C A R- tel est nostre plaisir.  
 En tesmoin de quoy nous auons fait mettre  
 nostre seel à celdites presentes. Donné à  
 Chantilly le 21. iour du mois d'Aoust, l'an  
 de grace 1636. Et de nostre regne le vingt-  
 septiesme. Signé, L O V I S. Et sur le reply,

Par le Roy, S V B L E T. Et scelees sur double queuë du grand sceau de cire iaune.

*Leuës & publiques l'Audience tenant, & registrees en la Cour des Aydes, Ouy & ce requerrant le Procureur General du Roy, pour estre executées selon leur forme & teneur, Et ordonné que coppies collationnées d'icelles seront enuoyées es Sieges des Elections du ressort de ladite Cour, pour y estre publiées & registrées, & publiées au Presne des Messes Parrochiales desdites Elections, à la diligence des Substitués dudit Procureur General, suivant l'Arrest de ladite Cour. Donné à Paris ce iour d'huyl les Chambres assemblees, le vingt-septiesme Aoust mil six cens trente six.*

---

**EXTRAICT DES REGISTRES**  
de la Cour des Aydes.



**E** V par la Cour les Chambres assemblees, les Lettres patentes du Roy en forme de Declaration, dōnees a Chantilly le 21. d'Aoust 1636. Signees, Louis: Et sur le reply, Par le Roy, Sublet: Et scelees sur double queuë de cire iaune. Par lesquelles pour les

causes y contenuës, la Majesté de l'Aduis de  
 son Conseil, & de sa certaine science, pleine  
 puissance & autorité Royale, auroit dit, de-  
 claré & ordonné, Veut & luy plaist, Qu'en  
 tout son Royaume, Pays, Terres & Seigneu-  
 ries de son obeyssance, Tous Marchands &  
 autres ses subiets, demeurent exempts, quit-  
 tes & deschargez du droit du sol pour liure,  
 & droits du scel & marque, ordonnez estre  
 leuez par l'Edict de sadite Majesté du mois  
 de Iuillet 1634. sur toutes & chacune les  
 marchandises, estoifes, ouurages & manufa-  
 ctures y mentionnees: Ensemble du parisis  
 des voictures par eau & par terre, ordonné  
 estre estably par Edict du mois de May 1635.  
 Deffendant tres-expressément aux Fermiers  
 des Aydes & cinq Grosses Fermes, & à tous  
 soubz-Fermiers, leurs Commis & tous au-  
 tres, d'exiger des subiets de sadite Majesté,  
 en quelque lieu que ce soit de son obeyssan-  
 ce, lesdits droits du sol pour liure, de scel &  
 marque des voictures, sur les peines portees  
 par lesdites Lettres, adressantes à ladite  
 Cour pour la verification d'icelles. Conclu-  
 sions du Procureur General du Roy: Et tout  
 considéré. LA COUR a ordonné & or-  
 donne, Que lesdites Lettres seront leuës,  
 publices & registrees en icelle, pour estre

executees selon leur forme & teneur, Ordonné que coppies collationnees d'icelles, seront enuoyees es Sieges des Elections du ressort de ladite Cour, pour y estre publiques & registrees, Et publiques aux Proshes des Messes Parrochialles desdites Elections, à la diligence des Substituts du Procureur General du Roy. Fait à Paris en la Cour des Aydes, les Chambres assemblees le vingt-septieme iour d'Aoust mil six cens trente six.

Signé,

BOUCHER.

Le vingt-septiesme iour d'Aoust audit an, la Declaration de sa Majesté a esté par moy Simon le Duc Iuré Crieur & ordinaire du Roy, sous-signé, leuë publique à son de trompe & cry public, es Carrefours ordinaires & extraordinaires de ceste Ville de Paris, & lieux accoustumez, à ce que du contenu nul n'en preigne cause d'ignorance. Et à ce faire estois accompagné de Mathurin Noiret Iuré trompette, & de deux autres Trompettes.

Signé,

LE DUC.